



17800 (d'inditgar en la resposta)

☎ 081 257 25 13
✉ info@djsg.gr.ch
www.djsg.gr.ch

Departament da giustia, segirezza e sanadad
Hofgraben 5, 7000 Cuira

A las adressatas ed als adressats
tenor la glista agiuntada

Cuira, ils 12 da november 2024

**Revisiun parziala da la Lescha per promover la tgira da personas malsaunas e l'assistenza da personas attempadas e da personas che basegnan tgira (Lescha per promover la tgira da personas malsaunas, LTM; DG 506.000);
Consultaziun**

Stimadas dunnas e stimads signurs

Perquai che la situaziun finanziaria dals ospitals publics dal Grischun sa pegiurescha cuntinua-damain, èsi ord vista da la Regenza necessari da prender mesiras, per evitar l'insolvenza che sma-natscha a curta ed a media vista als ospitals pertutgads. Tant il provediment da la sanadad decentral sco però er il provediment da center da la populaziun èn numnadamain periclitads en vista al svilup finanziel dals ospitals publics dal Grischun. Cun l'adattaziun planisada da la Lescha per promover la tgira da personas malsaunas e l'assistenza da personas attempadas e da personas che basegnan tgira (Lescha per promover la tgira da personas malsaunas, LTM; DG 506.000) duai vegnir stgaffida ina basa legala, che duai permetter a la Regenza da conceder emprests transitorics als ospitals publics per uschia procurar ch'els hajan puspè ina liquiditad suffizienta.

Pervia da la mancanza da bonitad èsi per ils bliers ospitals publics dal Grischun praticamain exclus da survegnir sin il martgà da chapital emprests per garantir la liquiditad ubain che tals emprests èn colliads cun fitg auts tschains (supplement da ristga). En cas d'ina crisa finanziaria duain il chantun e las vischnancas perquai avair la pussaivladad da conceder emprests transitorics als ospitals publics dal Grischun. Per quest intent prevesa la Regenza da metter a disposiziun in credit d'impegn general da 100 milliuns francs. Ils emprests pussaivels duain gidar ils ospitals pertutgads a surmun-tar periodas da crisa finanziaria. Cun agid da mesiras da sanaziun duain ils ospitals puspè pudair cuntanscher la rentabilitad resp. la quota d'autofinanziazion necessaria. Tras la pussaivladad da conceder emprests duain a medem temp vegnir rinforzadas las aspectativas dal martgà da chapital e vegnir impedita in'eventuala perdita da confidenza cun las respectivas consequenzas negativas per survegnir chapital ester.

Sch'i vegnan concedids emprests, profitan en emprima lingia las vischnancas purtadras dals ospitals pertutgads. Senza emprests stuessan las vischnancas – sco purtadras dal provediment da sanadad

public – star bunas sezzas cumplainamain per lur ospitals en situaziuns da crisa. Perquai duain las vischnancas sa participar cun 50 pertschient ad eventualas perditas che resultan da la concessiun d'emprests. Correspudentamain duain emprests vegnir concedids mo cun il consentiment da la maioritad da las vischnancas da la regiun da provediment da la sanadad respectiva.

Ils retschaviders dals emprests ston ultra da quai preschentar a la Regenza in plan da mesiras che sto garantir, ch'i resultia a curta fin a media vista puspè in resultat da gestiun positiv.

Pervia da las relaziuns finanzialas difficilas duain las regiuns da provediment da la sanadad plinavant survegnir la pussaivladad da transfurmar lur ospitals – en cas da basegn – en centers da sanadad ambulants. En quest connex vegn introducida ina regulaziun che duai simplifitgar las decisiuns da las regiuns da provediment da la sanadad concernent lur organisaziun. Decisiva duai mintgamai esser ina decisiun da maioritad da las persunas cun dretg da votar da las vischnancas respectivas.

Igl è planisà da metter en vigur la revisiun parziala per il 1. da schaner 2026.

Nus As supplitgain d'inoltrar Vossa posiziun davart il sboz dal project fin il pli tard ils **16 da december 2024**. Ils documents correspudents chattais Vus en l'aggiunta da questa brev. Per ans facilitar l'evaluaziun As supplitgain nus d'ans trametter Vossa posiziun per e-mail (info@djsq.gr.ch).

Nus As engraziain gia ordavant zunt fitg per Vossa posiziun e per l'interess che Vus demussais envers quest project.

SALIDS AMICABELS

DEPARTAMENT DA GIUSTIA,
SEGIREZZA E SANADAD

Il schef



Peter Peyer
Cussegljer guvernativ

Agiunta:

- Glista d'adressatas e d'adressats
- Revisiun da la lescha
- Text explicativ

Glista d'adressatas ed adressats

- Partidas politicas incl. partidas giuvnas
- Vischnancas politicas
- Regiuns da provediment da la sanadad
- Ospitals publics dal Grischun
- Federaziun grischuna Chasas ed ospitals
- Corporaziun da vischnancas «regiun d'ospital da la Val dal Rain Grischuna»
- Post da stab per l'egualitad da las schanzas per dunnas ed umens
- Departaments da l'administraziun chantunala
- Chanzlia chantunala
- Controlla da finanzas